

**Date – 09/06/2024**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

1. Mizo infiammi a tam thei ang berin Olympic Medal an awrh theih nana inbuatsaihna hmasa, Mizoram Sports Conclave tun thla ni 13 leh 14 hian Aizawl-ah buatsaih a ni dawn tih Sports Minister-in a sawi.
2. Mawma tlanga Ecological Park chu nimin khan Tourism Minister Pi Lalrinpuin Chakhei - I Upper Primary School-ah a hawng.
3. Sawrkar laipua sawrkar thar chu zaninah Rashtrapati Bhavan-ah lakluh a ni dawn.
4. Congress hruaitu Sonia Gandhi-i chu Congress Parliamentary Party Chairperson atan lungrual taka thlan a ni.



**MIZORAM SPORTS CONCLAVE**

Sports & Youth Services Minister Pu Lalnghinglova Hmar in Olympics 2026-ah Mizo infiammi a tam thei ang berin Olympic Medal an awrh theih nana inbuatsaihna hmasa, Mizoram Sports Conclave chu Baptist Centre, Falkland Aizawl-ah tun thla ni 13 leh ni 14 hian buatsaih a ni dawn tih a sawi.

Sports Minister hian nimina chanchinbumite a kawmnaah he thu hi sawiin, ram chhunga state-te zingah Mizoram chu Olympics 2026 lo thlirlawka National Level Sports Conclave buatsaih hmasa ber a ni, a ti a. Hmarchhak biala State pathum Sports Minister bakah sorkar laipua mi pawimawh te, Tata Trusts, Reliance Foundation Sports, Tata Steel leh Inspire Institute of Sports-a an hotute mai bakah ram chhung leh pawna infiammi mi lar leh chanchinbumite, Olympics-a tel infiamna hrang hranga Indian Federation leh Association hruaitute, Mizo Olympian C. Lalremsanga leh Lalremsiami te bakah infiammi hlawhtling dangte pawh an tel dawn tih a sawi a. Conclave buatsaih nan hian Scheme of Human Resources Development in Sports (HRDS) chuan Cheng Nuai 68 Sing 8 leh 500 an pe tih a sawi bawk.

(Corr)



## **TOURISM MINISTER**

Mara-te chenna hmuna tlang sang ber, Mawma tlanga Ecological Park chu nimin khan Tourism Minister Pi Lalrinpuiin Chakhei - I Upper Primary School-ah a hawng.

Pi Lalrinpuii chuan Zofaten tangkai taka an chhawr tur leh a duh apiangte tana tlawh theih turin ‘Mount Mawma Ecological Park’ chu lawm takin a hawng tih a sawi a. A enkawl mek Tourism Department- in hnathawh tur hmachhawp tam tak a nei a, a bikin Mizoram pawn lam atanga khualzin tam zawk hip tum mek a ni, a ti a. Siaha district pawhin Tourism department hmalakna hi a chhawr dawn hle tih sawiin, a hawn tak ‘Mount Mawma Ecological Park’ pawh hian tlawhtu tam tak nei belh zelin Chakhei mipuiten hlawkna tam zawk an nei dawn a ni, a ti.

Minister chuan Siaha district chhunga khaw thenkhat Community Hall la nei lo te tan theihtawp a chhuah mek tih a sawi a. Mi tam takin an tlawh fo thin ‘Beino Castle’ panna kawng laihna turin Asian Development Bank atanga sum leh pai hmuh a beiseiawm hle tih pawh sawiin Mizoram sawrkarin Mara mipuite a theihngilh ngai dawn lo, a ti a. Sawrkar chu Mizoram mipuite tana awm a nih angin mipuite chu sawrkara rinna nghat ngam turin a chah bawk.

Mount Mawma Ecological Park-ah hian Trekking leh Hiking route Mawma tlang chhip thlengin Cubic lung hmanga step siam a ni a. Trekking leh Hiking route-ah hian chawlh hahdamna tur pathum siam tel a ni bawk. Suspension bridge pawh siam niin, Camping Ground panga bakah Watch Tower leh Entry Gate te siam tel a ni a. Wildlife Enclosure - Birds net 128, fencing meter 946 leh Dil 1 siamin nauban 460 phun thar a ni bawk.

Report atanga a lan dan chuan Mount Mawma Ecological Park, Chakhei siam nan hian North Eastern Council (NEC) atangin Cheng Nuai 236 Sing 1 Sang 7 hmuh a ni a, M & M Construction & Consultancy, Ramhlun Vengthar, Aizawl ten hna hi an thawk a ni.

(DIPR)

<><><>

## **SCHOOL EDUCATION MINISTER**

School Education Minister Dr. Vanlalhlana’n tunlai khawvel thiamna, Artificial Intelligence (AI)-in mipuite a luh chilh tawh thu leh hemi hmachhawn tura inpuahchah a tul thu a sawi.

He thu hi Zirtawpnia School Education Department leh Higher & Technical Department hotute nena Samagra Shiksha Office Conference Room, Aizawla an thutkhawmnaah Minister chuan a sawi a. He thutkhawmah hian Minister chuan Education World Forum London-a thla hmasa ni 19 atanga ni 22 chhunga hun a hman atanga a zir chhuah hrang hrang a sawi a. Artificial Intelligence leh a kaihhnawih hrang hrangte zirlaite tana hman tangkai theih dan tur a tarlang a, Education Outcome Fund atanga puihna dawn theih dan te ngaihtuah a tul tih a sawi bawk a. Education World Forum 2024-ah hian hotu lu pawimawh tak tak te hmelhriata a kawm thu sawiin Minister hian zirna lama naupangten hma an sawn theihna turin an puihna a ngen nghal tih a sawi.

Thutkhawmah hian Education World forum 2024-a thupui “Encouraging AI understanding, Building human relationships and resilience accelerating climate action” chungchangte sawiho a ni a. Zirlaiten an tangkaipui zawk nan zirna in, school leh college syllabus-ah te AI, basic coding, data analysis te telh ni se tih rawtna an siam nghal a ni.



## **VARHVA BRIDGE**

Tuichang bialtu MLA, Dy. Govt. Chief Whip, Pu W. Chhuanawma'n nimin khan Tlangpui khuaah Varhva lei a hawng.

Varhva lei hi Tlangpui leh Khawlailung inkalpawhna tangkai tak a ni dawn a, Mizoram khaw chhak lam leh chhim lam district te inkalpawhna nasa takin a tihnai dawn a ni. Lei hi feet 9 a zau, feet 10 a sang, a ban leh ban inkar teha feet 29 a thui a ni. Lei siam nan hian Cheng Nuai 5 leh Sing 8 hman a ni. Lei dawh nan hian khawtlang leh mi thahnemngaiten tha leh sum nasa takin an thawh a, heng zawng zawng nena chhut hian Nuai 10 chuang seng anga ngaih a ni.

Lei hawna inkhawm Tlangpui Community Hall-a buatsaihah hian Pu W. Chhuanawma chuan Tlangpui khawtlang ten sawrkar tha chakna beisei mai lova, tanrualna hmanga lei an dawh chu ropui a tih thu sawiin Zoram puma puan darh tlak chanchin ngaihnam leh ropui a ni, a ti a. Tuichang bialtu MLA hian Tlangpui khaw hmalakna chu Mizoram khaw dangte tan pawha entawntlak nia a hriat avangin Assembly House-ah hial pawh a lo sawi chhuak tawh a, Assembly Recess Room-ah ngei pawh Member dang ten hriat chian chakin an zawt zui tih a tarlang.

He huna thusawitu dang MIFCO Chairman Pu Lalthazuala Royte chuan MIFCO chuan loneitute leh kuthnathawktute ban phakah awm an tum tih a sawi a. Bialtu MLA Pu W. Chhuanawma ruahmannaa sapthei leh lakhuihthei chingtute kawmna hun tha a nei thei chu lawmawm a tih thu a sawi bawk. Kuthnathawktuten man man zawk leh hlawk zawka thlai an hralh theih nan sawrkarin hma a la dawn a, mipuite chu taima taka hna lo thawh chhonzawm zel turin a ngen a ni.

Varhva lei hawna inkhawm hi Tlangpui VCP Pu Lalbiakluanga'n a kaihruai a ni.



## **ALL SET FOR SWEARING IN CEREMONY OF PM MODI FOR A CONSECUTIVE 3RD TERM**

Sawrkar laipua sawrkar thar chu zanin hian Rashtrapati Bhavan-ah lakluh a ni dawn.

President Droupadi Murmu-i chuan Prime Minister tura ruat Narendra Modi-a chu sawrkar thar siam turin a sawm a. Sawrkar thar hi zanin dar 7 leh minute 15-ah lakluh a ni ang. President chuan Narendra Modi-a leh Union Council of Minister-te chu rinawmna thu tiam tiring a lalut dawn a ni.

Puan tawh angin Zirtawpni khan Narendra Modi-a chuan President hnenah sawrkar thar an siam theih thu a hrih a. BJP President JP Nadda kaihruai NDA palaite chuan President chu an hmu bawk a, hetah hian BJP Parliamentary Party leader atana Narendra Modi-a an thlan thu ziakin President hnenah hian an hriattir a. NDA-a tel party-ten chu chu an thlawp thu chuanna lehkha President hnenah hian an thehluh nghal bawk a ni.

A zawna term 3 chelh tur Narendra Modi-a sawrkar thar lakluhna turah hian thenawm ram hrang hrang hruaitute sawm an ni a. Sri Lanka President - Ranil Wickremesinghe - Maldives President Dr. Mohamed Muizzu, Seychelles Vice-President Ahmed Afif leh Bangladesh Prime Minister Sheikh Hasina te, Mauritius

Prime Minister Pravind Kumar Jugnauth, Nepal Prime Minister Pushpa Kamal Dahal 'Prachanda' leh Bhutan Prime Minister Tshering Tobgay-te an rawn tel dawn a. Heng thenawm ram hruaitute hi nimin atang khan India-ah an rawn thleng khawm tan tawh a ni.

<><><>

### **SONIA GANDHI ELECTED AS CONGRESS PARLIAMENTARY PARTY CHAIRPERSON**

Congress hruaitu hlun Sonia Gandhi-i chu Congress Parliamentary Party (CPP) Chairperson atan nimin tlai khan lungruual taka thlan tlin a ni. Sonia Gandhi-i hian thlan tlin a ni chu a pawm thu an party hruaitu Rajeev Shukla chuan chanchinbu mite hnenah a sawi a ni.

Nimin vek khan Extended Congress Working Committee (CEC) chuan Rahul Gandhi-a chu Lok Sabha-a eptu hruaitu (Leader of Opposition) ni tura ngen nise tih chu lungruual takin an pawm a. Congress hruaitu KC Venugopal-a'n New Delhi-a chanchinbu mite hnenah CWC chuan Rahul Gandhi-a kaihhraina chu opposition chak tak ni tura an rin tawk thu a sawi a ni.

Congress Party hruaitu hlun Jairam Ramesh-a chuan tun tum inthlanpui kha Congress party tan chuan chakna thar petu a ni a ti a. State level-a an party dinhmun chu an zirchian tur thu a sawi bawk.

Extended Congress Working Committee thukhawm zingah hian Congress hruaitu hlun Sonia Gandhi, Rahul Gandhi leh party General Secretary Priyanka Gandhi Vadra-te pawh an tel a ni.

<><><>

### **UN INCLUDES ISRAEL AND HAMAS IN ITS ANNUAL REPORT ON VIOLATIONS AGAINST CHILDREN IN ARMED CONFLICTS**

United Nations chuan Israel leh Hamas chu ralthuama inbeihnaa naupang chungah thahrur thawhna huanga 'mualpho' list-ah an telh.

Tun tum hi hetiang list-a an tel vawikhatna ve ve a ni a. He list-ah hian Russia, Islamic State, al-Qaeda, Boko Haram, Afghanistan, Iraq, Myanmar, Somalia, Yemen leh Syria-te an lo lang tawh a ni.

Hemi huanga Israel a tel hi a langsar hle a, a chhan pawh mipui rorelna ram (democratic country) zing ami an tel vawi khatna a ni.

Hemi chungchang hi Israel Prime Minister Benjamin Netanyahu chuan a helh hle a. Israel Defence Force chu khawvela sipai laktlak ber an nih thu a sawi a, UN thil hriatsual hian a thlak danglam chuang lovang a ti a ni.

<><><>